

四庫全書

集部

欽定四庫全書

定齋集卷十六

宋 蔡戡 撰

賦

蚤賦

余每夕困於蚤寢不獲安心竊憤之嘗觀南
齊卞彬著蚤蝨賦史逸其辭余乃作賦補亡
因述其見虐之狀云

先生閒居讀書自適每夜分而乃寐幸身安而形佚目

欲瞑而輒警夢屢驚而欲失有物擾之不遑燕息或齧
吾臂或噬吾膝倏去歛來更跳互出其毒也如懷袖之
蜂蠆其虐也甚禪中之蟣蝨探索揣摩手不容釋空展
轉而無寐苦爬搔而通夕先生體癢而神疲曾不少安
於衽席於是心憤悶氣怫鬱自念此七尺之軀而見困
於纖芥之物呼童秉燭大搜冥索熾爐炭以交攻燎衾
裯而再易大者緣隙以深藏小者跳梁而散逸驚巧捷
以如神雖敏手而莫及童子時獻獲而奏功聊快吾之

胸臆顧族類之甚博想未能禽其十一也已而平心定
氣泛觀默識因念天地之間何物不殖蠕動肖翹胎卵
化濕蚊蚋蜂蝎螟蝗螫螚在物雖微為人之賊窮人力
以剷除恐天理之舛逆又況暑往寒來四時不忒消息
盈虛循環靡極背秋涉冬霜風瑟瑟萬物斂藏百蟲閉
蟄是物也黨散羣離滅影掃迹又何必取快于一時而
較力于纖悉姑少忍于須臾蓋乘除之可必先生乃安
斯寢乃夢遊華胥之國既寢而興但見三竿之紅日

五言古詩

餞張平甫折海棠贈之

天公作晚晴得得送行客
海棠新過雨染就胭脂色
醉臉嬌未勻啼粧紅欲滴
勸君白玉卮一醉不足惜
我生酷愛花為君須小摘
後夜月滿船持此伴幽寂

同張叔困顧致堯遊金山受之憚於涉險爽約不行因以詩簡之

我昔遊天都策足蓬萊山
風日不到處意謂非人寰
一

涉勢利塗未免塵埃間了知此身累痛自鐫冥頑浩然
動歸志暫得浮心閒金焦勝絕地自古名東南兩峯鬱
相望宛若雙雲鬟我欲事幽討不憚涉險艱同行二三
子壯氣不可干欣然從我遊竟日勞躋攀江神亦可人
為我風少慳要知仗忠信可以行百蠻阿連有童心平
生怯波瀾欲去足先溢未語膽已寒謂有性命憂力勉
終辭難我行自不惡盡得奇絕觀匆匆理回棹此興殊
未闌阿連驚我歸喜氣形眉端殷勤為我賀不意能生

還索酒共一醉相對俱歡顏

憶小兒

中年再舉子可喜亦可憐
半晷已知父舉手拊我肩
欲別不忍去離懷重悽然
兒生苦多病此念有拳拳
江聲鏖旅枕展轉不得眠
恍若聞兒聲常如在目前
我思不能已汝病何當痊
王事相促迫平明又加鞭

趙季若染髭走筆簡之

趙子方五十鬚鬢何斑斑
身老心未伏攬鏡嗟哀殘
染

髭學年少整容向雲鬟世間有仙訣坐使壯歲還霜華
喜頓改霞脚驚先爛乃知人力窮欲奪造化難黑白變
朝暮相對真面謾眉目且作偽而況方寸間勸君循天
理頽然任蒼顏漢廷方貴老白首尚握蘭

瓊花

平生湖海氣浪自青雲期一為蓬萊遊時動泉石思徒
糜太倉粟飽食終日嬉尸素亦已甚勇退夫何疑直道
無所愧願學柳士師歸來食不足三歎汝墳詩親老尚

擇祿富貴當何時捧檄強自喜安敢辭驅馳顧我性蕭
散軒裳縛伊尼何當出幕府還把江海麾思親匪懷土
此意惟君知君抱四方志扁舟羨鷗夷要先句踐霸乃
以西子隨不妨食肉相兼有絕俗姿暫淹芙蓉幕亟歸
鳳凰池

案下次韻詩此處當
再有二句原本闕

姚幹舜陟約觀瓊花因循未能往以詩相促因
次前韻

少年逐春心作意酬花期壯大頗更事舉足先三思況

有簡書畏本非倦游嬉姚子磊落人自信了不疑應變
似乃祖未肯為獵師婉畫多暇日餘事長于詩秀句摹
勝景清尊樂芳時對花不忍去唯恐光景馳愧我但局
促潔心似毗尼門墻可羅雀敢作揚雄麾高軒時過我
不遣俗客知幕中向無事世路方坦夷要當休沐日飛
蓋還相隨靈祠花藥麗皎皎方含姿何妨修禊事流杯
宴瑤池我欲為親壽憑君折繁枝

新居用韓昌黎詩辛勤三十年以有此屋廬為

韻作十詩

我家本儒素為吏廉而貧所仰斗升祿役役常苦辛無
地可置錫有釜多生塵空餘清白操以此遺後人

憶昔少年日抗志期青雲官遊三十載所歷多艱勤四
持湖海節再餉江淮軍全家得飽煖何以報吾君

獨醒衆所忌尸素心懷慚既有不堪七豈止宜休三再
則皆自取百謫其猶甘歸歟一邱壑卜築蘭陵南

晏子近囂塵蕭何處窮僻我居城市間而有山林適一

水帶清泚萬竹環翠密亦足了此生人壽稀七十

南軒款佳客北堂奉高年兩廡闢數舍幼累聊伏跽未能大門閭豈暇週墻垣求足何時足萬事姑隨緣

我居本寬餘湫隘良有以予舍雖不多聚族五百指月俸均薄少晨炊共甘美憂責叢一身冥行不知止

庭前植三桂門外栽五柳有禽號仙客愛蓮呼靜友隣墻竹千挺晚色落杯酒終日對此君烏知非我有

旁有十畝園荒穢久不理荷鋤薙蕪連筒灌桃李因

高築小坡就下鑿深沚杖屨日往來居閒賴有此

我亦大癡人勸者多不足抖擻囊中金傾倒園內粟雖
云壁徒立尚有田可鬻百口勿啼飢張願仰看屋

平生湖海氣志廣更才疎致君初無術許身一何愚慨
念天下士四海無家居但願庇廣廈不唯愛吾廬

朱丈朝宗索壺村落成之集次韻簡之

我本崑壑姿浪謂蓬瀛客下惠猶三黜孟公甘百謫况
如腹背毛敢意青雲翮一麾江海去自分仙凡隔稅駕

荆溪東屏居在幽穴雖無二頃田賴有一區宅壺村咫尺地聊以適其適公家百畝園下視雲夢窄風雲滿襟袖煙霞拂巾幘清溪一派流端疑巨靈擘桃李自成蹊皆公手封植顧我鄙無譏敢比齊楚國大厦未落成何事先促迫一笑真莫逆兩賢豈相厄我貧釜生魚傳家尚清白八珍絕肥甘一枕但甜黑抹月批清風客至聊具食乃知造物公獨此每無擇書生耳目寒得之即聲色公若肯一來與公分所得

病中紀事

我生天地間甲子倏一周歲與命相迫災釁非人謀抱
病卧漳浦荏苒久不瘳僂僂腰欲折僵仰筋如抽痛楚
徹心膂呻吟損咽喉浹背汗淋瀝環膝寒飈飈晨興服
絺綌夜卧重衾稠垢膩生蟣蝨爬搔變瘡疔寢食殆俱
廢起處寧自由跬步遠千里僂局如拘囚艾火既妄灼
藥劑還輕投以此千金軀寄命庸醫流展轉幾十旬初
夏俄清秋去死一間耳自歎如浮漚有身即有患無生

乃無憂彭殤齊壽夭螻蟻同王侯四大非我有外物何
勞求委心以待盡死生任浮休

效白樂天體自詠二十韻

人生七十稀我今六十六幼小承門資長大竊科目平
步登瀛洲超遷應郎宿省寺久徊翔京華厭馳逐七持
使者節三剖刺史竹晚玷兩禁班濫紆三品服游宦四
十年徒糜太倉粟君恩無以報捫心自慙慙吾聞老氏
言知足乃不辱力辭會稽組願賦祠庭祿舉首謝鵷鴻

甘心友麋鹿家有十頃田居多數椽屋長子通朝籍二
女歸仕族貤恩沾弟姪餘俸贍親屬始望豈及此平生
不啻足無奈百病侵齒豁頭已禿指攣足蹢跚背駝腰
屈曲消長自乘除禍福多倚伏枚數親舊間十九登鬼
錄自憐衰病翁詎知不為福

又自詠效樂天體

我家曾高來享年稀六十吾祖逾九齡屈指十之一嗟
予蒲柳姿不覺開七秩雖幸延殘年其奈嬰耒疾人生

一世間無異駒過隙孔跖俱塵埃彭殤漫欣戚苟免饑
寒憂况又婚嫁畢生亦何可戀死固不足惜棺槨已素
具墳壠漸加葺委順以待時臘月三十日

七言古詩

題端約喜神詩

高樓結蜃橋垂虹人間夢幻色即空何勞愚智徒相攻
無異蠻觸戰蝸蟲先生學道尤溫恭皎然明月來窻櫺
幅巾宛有林下風身雖隱約聲如鏞何人為寫冰雪容

屹若山立凝神鋒長松詰曲盤蚪龍朱藤緩步行松中
治世乃有商山翁青鞋不踏京塵紅宦遊已悟禽入籠
誰能薄祿仰釜鍾百年駒隙成匆匆一廬可老荆谿東
家父約端約飯端約以疾辭乃作古風併送臘
梅數枝因次前韻

詩仙逸氣舒長虹一洗萬古凡馬空五車蠹字勤且攻
不肯區區辨魚蟲雪中鶴筆如王恭誰能低唱深簾櫳
年來何事怯霜風閉門索句鳴笙鏞新詩為我開愁容

退避豈敢爭詞鋒君不可屈真卧龍小窻獨坐時一中
故折金蓓贈我翁絕勝桃杏漫山紅君詩當得碧紗籠
此花宜侑琉璃鍾走筆寄謝仍匆匆昏昏暮叩戶驚隣東
再用前韻酬端約

君才千丈騰彩虹揮毫落紙萬象空我猶頑石不可攻
愁吟嘈雜鳴寒蟲典刑況有先文恭短檠終夜臨書櫳
騷雅不減陶謝風簫韶迭奏鼓與鏞顧我羞澁難為容
鉛刀一割無餘鋒古人相遇如雲龍交情自得氣槩中

翛然坐對兩臞翁一笑莫逆醉臉紅
世間萬事空牢籠
信知我輩情所鍾
舉杯屬君無匆匆
人生聚散西復東

送張安國舍人

若有人兮下天陬
乘雲戲作人間遊
飄飄逸氣橫九州
明光射策動冕旒
一揮坐遣千人休
老生瑟瑟縮徒包羞
餘子走僵汗且流
自顧跛蹙驚驂騑
大兒文舉小兒脩
眼高四海非吾儔
堂堂人物傾曹劉
冰壺玉尺懸清秋
胸次二十八宿周
筆力乃與造化侔
揮毫落紙蟠龍蚪

殘篇醉墨人爭收
蚤年嬉笑登瀛洲
螭坳鳳閣增皇猷
出典方面分顧憂
昔襦今袴歡成謳
六州父老思故侯
往往在處甘棠留
祠庭均逸心夷猶
祇恐富貴來相求
公今起自曲江頭
蒲帆十幅風颼颼
微官拘縛如楚囚
雖欲從公嗟無由
君王仄席勤咨諏
姓字當已覆金甌
入登廊廟參籌謀
勲庸併使書銀鈎
他時東閣羅枚鄒
賤子還許登門不

送莫子漳還朝

長安車馬聲隆隆千官朝入明光宮我時迹通金閨籍
猥以麋鹿參鵷鴻魏闕睽鑣競趨走漢殿屬袂陪肅雍
銀章朱紱赤縣令一見傾蓋稠人中搢紳交口譽盛美
政有三異如魯恭不勞烹鮮撫赤子不憚拔薤鋤強宗
二年惠澤洽百里一日治行聞九重帝曰卿才當大用
乃使驥騄試蟻封毗陵今日股肱郡往來水陸當其衝
比年積蠹寢不治公私赤立帑廩空與我共理二千石
無以踰此強項公割鷄焉用庖丁手斲鼻乃見匠石工

公初下車問疾苦萬家和氣生春風政平訟理百廢舉
昔襦今袴喧兒童鈴齋宴坐未煖席宣室趣召還追鋒
公來邦人歎何暮不謂公去仍匆匆依劉多士願莫遂
借寇千里嗟無從聖朝籲俊方重內此行自與登仙同
高士不妨為主簿先儒蓋亦嘗司農功名富貴儻來物
寧論小釜與大鍾古人立朝有始末出處進退常雍容
君家伯氏典刑在願君勉力追前蹤贈言敢竊仁者號
聊以寫我磊砢胸方今天子堯舜上安得稷契輸誠衷

士氣萎靡思苟得民力彫弊屢告窮聞君欲草三千牘
宜以此語裨宸聰

長風沙

舟人指點長風沙寂寞煙村三數家寒日熒熒照楓葉
霜風撼撼飛蘆花江頭景物自不惡買魚沽酒時獨酌
扁舟日日弄煙波此生空羨漁家樂

和楊廷秀游蒲澗之什

我來戲作南海游兩驚落葉鳴新秋文書暇日得勝侶

登臨清賞遨頭萬壑爭流如爪裂天公幻出神仙窟
巖前滴水七月寒巖下飛濤四時雪要當躡履攜枯藤
躋攀石磴褰裳行勿令俗物敗人意暫止喝道聽松聲
安期已去寧復見井竈漫傳丹九轉尚餘玉舄在人間
特特追尋不辭遠脚力已盡病莫興好山無窮相送迎
山林鐘鼎雖異趣崎嶇瑯琊皆勞生更上危樓臨峭壁
時見疎林鳥飛白一峯突兀鬱相望萬頃滄波湛空碧
此身疑是在蓬壺下瞰城郭如盤盂恨無詩才可八斗

領畧羣山但卮酒人生上壽不百年白雲駕我我即仙
從此去天只尺五俯仰人間自今古

筇竹杖歌

我有一枝筇天矯如游龍由來博望使西域萬里持寄
衰病翁自蜀歷楚入吳越名山勝地多留蹤先排衡山
雲直上南臺升祝融次登峴山首北望京洛浮塵中白
鷺洲前弄明月黃鶴樓上迎清風東遊秦望探禹穴天
台鴈蕩觀奇峯孤根端有歲寒操勁節肯染京塵紅飄

然飛去不可執西山南浦聊從容放行天地無障礙倚
觀宇宙皆虛空橫挑斜曳任所適去來無定如飛鴻提
攜九節常在手四方上下俱相從我常病足不能履賴
汝左右扶持功老形已具身傴僂詎可一日無此公杖
兮切勿化龍去留取百歲扶衰慵

奉和子真學士詠雪之什

千里同雲欲曛黑風掠寒郊聲撼撼初疑窻外忽增明
俄見堦前已紛積曉來戲作漫天飛臘後喜占平地尺

回飆凌亂競穿簾作態橫斜巧投隙乾坤浩蕩迷俯仰
唯有寒江湛空碧扁舟遠訪漫乘興敗履徐行間留跡
向晚漁簑入畫圖清夜難窻映文籍從教高卧野人廬
未饒低謁王侯宅灞橋才子更清絕強把枯腸苦搜索
最憐擾擾雪中人晨突無煙有饑色何當三白兆豐年
盡挽八荒歸樂國不但新春壓災瘴且喜明年飫麩麥
我家賴有二頃田老去功名慵轉劇人生一飽復何求
卒歲優游聊自得

再次前韻上呈

雲幙四垂頭上黑微霰飛霙初撼撼衾裯不煖夜更寒
庭戶無聲曉仍集漫空龍鳳落萬家入地螟蝗想千尺
因風作響急敲窻得月交光先透隙園林巧綴鬪新奇
樓觀勻鋪失金碧今朝知是謫仙來門前踏作瓊瑤迹
雪車句好憶劉叉縞帶詩成走張籍但得同傾北海尊
不妨屢過揚雄宅須知里社樂有餘正恐太倉米徒索
愁吟時作郊島寒飽食幸無陳蔡色破賊空慙李常侍

仗節未許蘇屬國祗今力穡學老農剝喜流膏滋宿麥
杜陵一飯不忘君憂國丹心老彌劇願言玉燭常均調
萬物忻忻俱自得

昌黎有詠雪
贈張籍詩

大雪不止再次前韻

元冥一怒天地黑巽二前驅聲撼撼須臾白帝振軒裳
龍鳳幡旂交委積舊傳洛邑深丈餘今比常山纔數尺
天公作意逞陰機翦水裁霜巧無隙雲濤萬頃俱浩蕩
海風吹散琉璃碧坤軸摧壓幾欲頽日輪埋沒渾無跡

定知謫墮萬玉妃紫府清都削名籍可惜飛瓊天不管
等閒幻作神仙宅詩人嘲弄困萬象苦思不妨閉門索
攢眉呵手撚凍髯得意忻然見顏色英詞逸氣吞江湖
竊比君才如楚國看花君子待新晴又見春風搖燕麥
我方疊石築小坡人笑老翁似兒劇何當躡履共登臨
一覽山川皆盡得

子真新篇愈出愈工壓倒元白三歎不已勉強
再次前韻

獨守寒牕坐昏黑怪底打門聲撼撼呼童秉燭誦新詩
篋笥珠璣喜盈積君家文焰萬丈長愧我才慳真退尺
往來政自足風流唱酬聊可供閒隙劇談快飲坐生春
一笑相看眼俱碧曉來百鳥報新晴漸喜門前多轍迹
眼明頓覺有春意耳冷況聞開樂籍何勞空泛剡溪舟
不如沉醉高陽宅樓迴吹殘玉笛寒杯乾笑指銀鉗索
遙知塞上積雪深千里關山同一色夕烽罷警鐵衣閒
聘幣星馳交兩國使華不用吞旃毛邊吏何憂取溫麥

祇憐魚貫挽舟人墮指裂膚聲苦劇東風吹作一尺泥
山鳥却愁行不得

朱朝宗割愛嫁遣侍兒忘情如此是可尚也因
作忘情吟以道哀怨之意

風流漢署尚書郎蛾眉列屋呈新粧中有一人十四五
雪膚花艷傾後房妬寵負恃亦常理何乃棄置行路傍
妾如桃李眩顏色君如鐵石為心腸憶昔贈君綠綺琴
佳期密意寓琴心白雪陽春世寡和高山流水誰知音


燕子樓中空寂寞鳳凰臺上忍登臨餅沉簪斷不堪說
釵分鏡破何由尋君不見韓退之絳桃柳枝二侍兒別
來柳枝已飛去故作鎮州初歸詩又不見白樂天小蠻
樊素爭取憐晚年樊素欲謝遣因賦不能忘情篇從來
我輩情所鍾綿綿此恨今古同世間尤物最為累須信
萬事浮雲空二公號為知道者未免愛慾纏胸中果能
脫去如敝屣自古未有賢於公料得文君對長卿小牕
時鼓一再行幽愁暗恨欲備寫離鸞別鶴難成聲知君

手種堂前柳春風披拂還輕盈憐新棄舊似淺薄如君
未必真忘情

有感

人生一世間常苦不自足冬寒但重裘日食唯一肉所
須能幾何甘心事馳逐何郎費萬錢徒令厭僮僕長卿
乘駟馬祇欲誇世俗于我何有哉浮榮不償辱回思五
鼎烹焉用萬鍾祿朱紫蒙陷穽簪笏如桎梏勿為穀觫
牛寧作擁腫木君看白玉堂未比黃茅屋卧聽元戎報

五更何如日高三丈春睡熟



欽定四庫全書

集部

定齋集卷

十七至
二十

詳校官庶吉士_臣初喬齡

主事_臣呂雲棟覆勘

謄錄監生_臣范重榮

欽定四庫全書

定齋集卷十七

宋 蔡戡 撰

五言律詩

晚泊江臯

日暮西江遠，停橈傍水村。
葉舟橫野渡，茅店掩柴門。
牧笛隨風遠，漁燈帶雨昏。
一枝梅照水，行客總消魂。

送介卿之官金臺

四海皆兄弟，情親能幾人。
相看青眼舊，摠作白頭新。
直

道何妨拙微官祇為貧老來仍惜別把酒話酸辛

淵明去彭澤斯立佐藍田家近真良便官閒任左遷相望雖百里此別又三年擬辦登山屐從君訪洞天

夢介卿感而有作

湖海三年別關山萬里程故人頻入夢游子若為情家近吳王苑身居義帝城平生雞黍約何日更尋盟

憶昔兒童日光陰急鳥飛舊遊渾似夢倦客只思歸青眼還如昨朱顏漸覺非柳陽縱無雁音問未應稀

孝宗皇帝靈駕發引詩

歷數承堯禪謳歌戴舜仁規模自宏遠法度謹持循
儉約身先下憂勤志在民萬方無以報雨泣但霑巾

舜禹相傳日元非倦萬幾慈闈躬至養別殿奉遺衣
易月心何忍通喪禮不違煌煌新廟號萬古播音徽

崑仲八兄有茗溪之行草酌話別而次何叔養
正十二兄爽約不至坐客唯三人因以詩紀之

自古推同姓相從弟與兄已占東井聚誰謂秦階平龍

友當為首鵷行近有聲同堅歲寒操終始勿渝盟

即席和端約韻

竹溪追勝際得侶最為多自覺功名懶空嗟歲月磨夢
驚風落葉心破雨鳴荷無此杯中物其如良夜何

舟行有感

仕路多艱棘人生更轉蓬浮雲偏蔽日駭浪不因風世
事愁眉外人情醉眼中老來齊得喪方寸等虛空

予頃歲持節湖湘今二十四年白首重來親舊

十無二三感而有作

落日放扁舟
瀟湘生暮愁
故人疑不見
離思渺難收
鼓瑟空遺恨
吹簫憶舊游
劉郎今老矣
霜鬢不禁秋

秋日書懷

遊宦輕千里
閒愁度一秋
衰顏慵攬鏡
病足怯登樓
事業因循廢
功名取次休
人生聊復爾
一飽更何求
刻意搜詩句
清心玩易爻
几塵留鼠迹
窻影印梅梢
泉石頻招隱
壺觴已絕交
橫挑一柳栗
在處寄僧包

送九兄僉書歸二首

離別一何久漂流不記年昔君猶壯歲今我亦華鬢隔
濶疑如夢從容喜欲顛弟兄能有幾及此對床眠

中年仍再別歸意苦難留風雨傷心夜江山滿目秋西
堂詩入夢東閣酒添愁他日荆溪上無違具一舟

西堂東閣

二謝二
蘓事

先人嘗宰貴池今二十五年矣舟行經此不勝

黯然

夜泊貴池口此情殊黯然思親空有泪感舊不成眠
棠舍清陰在桐鄉舊政傳終天成永感忍聽蓼莪篇

至日書懷

病起逢佳節羈懷只自傷老來衰自至身與世相忘
髮引千絲亂愁添一綫長功名真已矣此意付滄浪

乙卯春病中書

老去那堪病春來總自愁關心惟藥物寄命向醫流
世事多翻覆吾生任去留一厘真可老此外更何求

遣興

世味只如許人情亦可憐
禪心甘寂寞病體覺輕便
夢裡身非我閒中日似年
還家真復樂此去若登仙

醉裏乾坤大閒中日月長
靜觀佛理妙頓與世緣忘
晚景無多日浮生有底忙
漁翁真得趣一葉寄滄浪

江海倦遊客乾坤老病身
儻來皆外物自在作閒人
睡足從吾懶歡來任我真
治生且耕鑿無愧葛天民

衰病人應棄窮愁孰與親
同行木上座並卧竹夫人
習

定調千息談空外一身轍環天下半送老楚江濱

獨立

獨立寒江上蕭然一秃翁夢魂驚雪浪病骨怯霜風
遠樹斜陽外荒村暮靄中間身無一事樽酒與誰同

丐祠得請喜而有作示介卿

多病身先懶閒居樂有餘山林真可老故事未應踈性
與禽魚適身便水竹居非無軒冕志吾亦愛吾廬

人心輕萬仞吾志在兼山知止今真止求閒復得閒天

應念衰病人免笑癡頑二老風流在何妨日往還

丙辰罷郡得祠

世論可憐哉無心任去來狙公徒自喜鷗鳥浪相猜塞
馬寧非福池魚枉見災扁舟從此去回首謝氛埃

水閣偶成二首

小閣枕橫塘荷花渡晚香月華秋更白水氣夜偏涼地
僻人稀到心閒夢亦長北窗聊寄傲身世兩相忘

徙倚危樓久無言對夕暉野花隨處發水鳥傍人飛自

覺身無累那知世有機何勞戰蝸角萬事轉頭非

書懷

消息觀天道炎涼閱世情禪心了生死病骨識陰晴杜
宇傷心切梅花照眼清楚香讀周易頓覺此身輕

淳熙戊戌將命廣東侍親携帑十一月至安仁
留雲錦驛一宿而去時晉卿姪偕行後二十三
年分閫桂林晉卿主餘干簿復以是月來會于
此把殘道舊為之愴然因成一詩示晉卿

憶昨南遊日今餘二十年扶輿潘母健舉按孟光賢遠
宦徒勞耳重來倍愴然若非吾小阮隻影更誰憐

胡端約挽詩

一代風流盡如公能幾人病來猶筆健老去更詩新握
手言無間傷心迹已陳墨君時一玩感慨淚霑巾

長卿多酒病子美太詩癯談笑隨時樂風標絕代無遺
編應百卷怪石漫千株賴此青氈物傳家有鳳雛

顏魯子挽詩

耆舊三朝望
廉平百吏師
愛民先節用
直道靡容私
自視一無愧
真成三不欺
遺民應罷市
淚墮岷山碑

昔年顏氏子
當代魯公孫
德行端能繼
典刑今尚存
平生窺聖閫
晚歲踏空門
歸即歸兜率
雲堂第幾尊

代趙儀可挽劉叔丙

此士不可得
鄉人今始思
迎賓多事日
教子廢科時
望屋訟自止
弄丸爭者誰
京華攜手處
憶著最傷悲

王季立安撫挽詩

世襲樞庭貴仍專帥府權公忠由性稟清白自家傳剖
決神明速安懷畏愛全功名方迫逐天不假長年

相門叨下客帥幕得佳賓玉樹連堦砌芙蓉泛水濱通
家仍有契論世豈無人埋玉空遺恨潸然淚滿襟

康素居士邵君挽詩

當代求遺逸斯人尚典刑雲愁富春渚月掩少微星易
簣無多語空籬但一經遺休宜有後蘭玉滿階庭

世儒多戶牖家學自淵源處士名兼美先王道益尊黃

金散閭里白玉揜丘原猿鶴空淒怨清江遶故園

提舉中奉程公挽詩

典午源流遠安鄉世胄隆
庶平儒者政樸素古人風
五福身兼備三尊德最崇
善人無復見忍看一旌紅

靜退身無累安閒意有餘
一麾真漫爾三徑盍歸與肯

酌貪泉水

公以嫌不赴閩舶

甘乘下澤車後生知敬慕遺行藹

鄉閭

張有年提舉挽詩

天上張公子家聲四海知
晚方持使節聊復擁州麾
嶺嶠多遺愛蕃人亦去思
遠民應罷市汨壓岷山碑

挺出英雄後居多長者稱
祖風知未泯世德自相承
口不談臧否人應寡怨憎
善人宜有後衮衮看騫騰

丁收仲寺丞挽詩

元祐名卿後甘盤舊學臣
肯堂真有子論世豈無人
仕至二千石年垂八十春
哀榮子母憾全福更誰倫

耆舊凋零盡吾猶及此公
典刑前輩近氣概古人同
抵

掌談如在掀髯笑已空堂堂寧復見蕭瑟九原中
華屋平生處傷心事已非綠衣方共樂寶劍忽雙飛漫
說乘鸞去終期化鶴歸長年知有淚感慨一沾衣

沈朝儀之淵挽詩

早擅雲間譽唯公伯仲賢諫篇餘祖烈經學自家傳出
處無餘恨哀榮得兩全善人今已矣埋玉向新阡
仕至二千石年餘七十秋長生應有訣勇退復何求耆
舊凋零盡功名取次休莫陪蒿里餞東望隴雲愁

故廬陵府君葛公挽詩

家風惟孝友世系本神僊丹藥能延壽衣冠不乏賢享
齡餘七十積行滿三千存歿無遺恨青氈有子傳

耆舊如公少明時豈棄材一麾聊出守三徑即歸來白
璧人何在黃梁夢已回秋風正搖落楚挽不勝哀

張晉英侍郎挽詩

當代推耆舊如公能幾人典刑唐閣老風采漢廷臣直
筆書青史巍冠侍紫宸壺公非不遇猶未究經綸

賈傳年方少詞場屢策勲賢關馳雋譽仕路藹清芬德
望三朝重聲名四海聞僊遊向何許地下亦修文

韓子溫母秦國太夫人挽詩

際會中興日來歸異姓王艱危從戰陳淑謹自閨房眼
看兒孫盛身膺福壽長平生修淨業一念即西方

八座太夫人疏封大國秦鄴侯仍有子陶母不憂貧四
紀恩光渥三朝錫賚頻哀榮極終始當代更誰倫

齊子餘母太夫人王氏挽詩

江左推門地華陽接洞天
嬪夫成宅相教子作時賢
富貴三從備衰榮五福全
平生勤事佛兜率是良緣

向來小宗伯日侍太夫人
地占梁溪勝風流峴首春
版輿隨處樂綵服逐時新
歎萱堂夢居然迹已陳

石窀恩雖渥蘭陔事已非
升堂人不見執紼淚頻揮
樹競晚風急草明朝露晞
他年黃閣宴不及奉慈闈

趙從善母吉國夫人劉氏挽詩

鍾英推后族擇配得王孫
兩大夫仍貴三從母益尊
版

輿欣就養鈿軸屢承恩尚想平反日慈顏一笑溫
令子方通顯神京更浩穰珍羞供鼎食綵服資金章大
國初封吉佳城忽葬貳卿哀慕切老淚浥千行

劉公實母夫人董氏挽詩

杏圃僊遊遠桃源往事虧名高孝婦傳詞揆外孫碑孟
鼎方知貴萊衣不復嬉生男有如此天道豈無知

列寺名卿重慈闈壽母尊眼中看五世膝下擁重孫九
九登遐算三三達妙門哀榮極終始全福更何言

五言排律

感事

親舊頻凋喪于今能幾人
光陰雙轉轂富貴一微塵
自歎癡頑老人憐衰病
身直饒心似鐵未免鬢如銀
安樂能延壽憂勞漫損神
平生齊得喪六十六年春

定齋集卷十七考證

第七頁前五行 案宋末趙儀可名文著有青山集與
戲時代不相及疑別一人同姓名者或他人詩誤入
戲集今無別本可校姑仍其舊錄之

欽定四庫全書

定齋集卷十八

宋 蔡戡 撰

七言律詩

送張子儀尚書起鎮東陽

自古雙溪山水鄉，風流仍繼沈東陽。
禁庭久曳尚書履，輔郡方懷太守章。
再世甘棠留勿翦，百年喬木鬱相望。
公家況有青氈在，會見登庸坐廟堂。

送蔣子立赴河南試

槐花拂拂弄輕黃
白紵雲趨翰墨場
魯國儒冠能有幾
長沙舞袖頗相妨
英材自是千人敵
小試猶爭一日長
來歲皇都春色好
馬蹄應帶百花香

平生天上張公子
一旦翻從地下游
不特文章傳籍湜
定知禮樂付程仇
高山流水無真賞
白璧明珠勿暗投
他日大廷承顧問
好將忠讜薦宸旒

觀雪

天公一笑喜生春
坐見丘原物物新
素色連空迷俯仰

寒光借月作精神
千金子宴無虛日
萬王妃來不動塵
斗米如珠薪比桂
可憐擾擾雪中人

乾坤浩蕩渺無涯
龍鳳縱橫落萬家
似與宓妃矜態度
未應姑射並容華
排簷巧綴纖纖玉
著樹齊開種種花
料得瓊瑤天不惜
等閒狼籍委泥沙

用前韻

裁霜翦水戲成春
瓊蘂瑤華巧鬪新
驢帽清寒詩得助
漁蓑幽絕畫通神
峯巒幻出千尋玉
宇宙空無一點塵

我欲乘風入閭闔不知飛珮更何人

江梅欺壓任橫斜愁殺西湖處士家
賴有凍醪供熟醉
斷無傑句寫芳華
玉樓不夜家家月
瓊樹先春處處花
想見寒江最奇絕
扁舟蓑笠釣雲沙

再用前韻

東君作意欲先春
故放千林火速新
風急亂飄初眩眼
地空遠望忽迷神
簷楹不動垂冰柱
庭戶無聲糝玉塵
留取寒光待元夕
一時燈月付遊人

不用扁舟尋故友但穿敗履訪鄰家雪堂歸去東坡老
雲馭飛來萼綠華稚子歡呼驚柳絮佳人疑悞認梅花
出門天地俱無礙却意江空月在沙

雪中端約相招因以詩簡之

纖纖暮雨變飛雲夜聽敲窓瀉竹聲柳絮因風誠可擬
梅花帶月有餘清梁園公子方開宴姑射神人最賦情
可笑寒儒無秀句一詩聊欲問前盟

易地湖外喜而有作

平生何意作南遊直為飢驅不自由天外飛鳶驚昨夢
峯前回雁喚離愁再賡漢節君恩重一笑潘興喜氣浮
慚愧向來三百指團圞歸去更何求

為趙氏題三桂堂

千佛聯名未足多書生榮遇已如何鍾英况出神明胄
接武仍登甲乙科郝氏一枝猶可貴燕山五桂未能過
矧君四世推良吏信史垂芳永不磨

觀雪

卧聽跳珠落瓦溝
曉來飛雪凍雲稠
晃觀佛國三千界
幻出僊家十二樓
公子休誇梁苑宴
高人空泛剡溪舟
何如縛取吳元濟
夜半銜枚入蔡州

再用觀雪韻

幽居窮僻傍邗溝
晚歲天寒雪意稠
高卧但知深閉戶
縱觀何敢共登樓
寒驚遠塞孤飛雁
重壓清江獨釣舟
遙想千官馳入賀
葱葱和氣滿皇州

憶故園梅花

遙憶家山千樹梅幾年心力費栽培
雪中最喜登樓望月下偏宜傍水開
東閣自憐詩興懶平泉不見信音來
庄人行矣休官去怨鶴驚猿勿浪猜

鴈蕩

又持一節向東州自怪平生欠此遊
勝地百年開鴈蕩漏天千古瀉龍湫
雲生半岫輕隨足泉落空巖急打頭
却恨昔賢無轍迹謝公嶺上更遲留

道中述懷

分閫南來兩見秋，不才多病合歸休。
奔馳水陸三千里，經歷江湖十四洲。
鱸膾蓴絲懷古里，梅花雪片送行舟。
自慚尸素終無補，只為憂邊白盡頭。

送胡季玉還毗陵

瘴雨蠻烟畫不開，問君底事亦南來。
外臺總計慙無術，內府輸珍信有才。
我去鴈峯同北鄉，子行梅嶺帶春回。
故園花竹平安否，何日從容共一杯。

元夕出遊

九衢燈火萬家春
嶺外風光自可人
剩喜豐登好時節
會須打撲困精神
嬉遊要屬風流帥
衰懶何堪老病身
勉強追陪非得已
由來憂樂本吾民

思歸

世事端如一局碁
光陰還若擲梭飛
亡弓休問人得失
佩劍那知孰是非
每對西山看不厭
何當南浦送將歸
不如從此扁舟去
江上秋高蟹正肥

久留瘴嶺苦思歸
安得身如越鳥飛
老去宦情真是薄

年來樂事覺全稀
衰顏得酒還如少
病骨添衣却似肥
只為萑蘆動歸思
非關勇退早知幾

登榕溪閣

公餘贏得暫時休
歸騎匆匆更少留
古木千章環美蔭
危亭百尺枕清流
詩翁僊去留遺跡
病守重來訪昔遊
坐久西山銜落照
一行鷗鷺起汀洲

陪憲使登榕溪閣

歸途重約使輶臨
為愛榕溪十畝陰
俯瞰江流青一帶

坐看山色碧千尋共拚沉醉酬佳節暫駐斜暉縱賞心
因念玉關人已老不堪搖落又秋深

用前韻成二首一以謝憲使和章一以述懷

五嶺何煩漢節臨暫來南國種棠陰詩親老杜真無敵
迹訪涪翁尚可尋登覽漫窮千里目衰遲唯有五湖心

江山彈壓歸詩伯詩賦梅花雪片深

榕溪有涪翁留題

老去重陽又再臨等閒駒隙度光陰虛名何苦勞方寸
直道焉能枉尺尋夜雨梧桐驚客夢秋風鱸膾動歸心

詔恩若許休官去笑指山林遠更深

再用前韻

當代名流共一臨勝游應不減山陰寸筵詎可撞千石
短綆徒勞汲百尋松竹要堅三友操金蘭默契二人心
時平歲稔文書省緩引清觴莫厭深

丁未立春日讀白樂天浩歌行不覺身年四十
七之句時方悼亡有感而作

不覺身年四十七此身雖在鬢如霜平生意氣空摧索

老去功名付渺茫愁裏不知佳節至尊前那復少年狂
梅花紙帳焚香坐感舊傷懷淚兩行

芍藥

自古維揚厥草天露紅煙紫不勝嬌鄭風已久名溱洧
洛品猶堪壓魏姚痛飲莫辭金鑿落清標偏愛玉逍遙
楚狂小子嗟多病坐對珍叢不自聊

過鄱陽湖適遇便風喜而有作

多謝江神不世情為憐逐客送歸程一帆風力如飛疾

千里湖光似掌平，要自吾生仗忠信。自然此意格神明，
反思宦路風波惡。屢觸危機夢亦驚。

十月十六日發南昌，下半月過建康，便風順流，
日行二百里。舟人云：未有如此速者。

鍾陵一水下金陵，輕舸何勞半月程。千里快風衝雪浪，
一天寒日弄霜晴。天公有意如相念，川后安流自不驚。
料得還家時節近，買羊沽酒互逢迎。

南昌大閱

自昔洪都地望雄
劍光直與斗牛通
角聲悲壯秋風裏
旗影橫斜晚照中
簾幕萬家觀小隊
弓刀千騎擁元戎
此身雖老心猶壯
自笑憑鞍矍鑠翁

滕王閣

傑閣崢嶸枕古城
公餘扶病一登臨
西山拄笏增詩興
南浦飛帆動客心
白鳥去邊迎落日
青林斷處認遙岑
摩挲石刻空三嘆
吏部文章絕古今

至日書懷

自笑癡兒得許忙
閉門便覺日舒長
作詩擬學江西派
起疾多求海上方
老去光陰空嘆息
病逢時節轉淒涼
可憐隻影無聊賴
兒女三人各一方

詠雪和介卿韻

詩翁咳唾自成珠
畫筆新傳粉墨圖
大白賡酬金湫灩
小紅團坐錦糲糊
縱觀佛界成銀色
疑入僊家醉玉壺
應笑陰何用心苦
愁吟終夜撥寒爐

再和前韻

郢客清歌若貫珠迴風妙舞巧難圖漫空片片勻如翦
投隙紛紛密似糊溪月一鉤窺玉鏡江梅千樹插冰壺
何人乞我僊家帽共傲禪床與藥爐

浙東憲司會同年八人以詩記之

乾道龍飛二紀前一時再會八同年諸公誰念廣丈冷
三已方知令尹賢別乘達尊人共敬軺車並駕我叨先
蘭亭又見羣賢集盛事宜將琬琰鐫

二教二令二
倅二使者

重九日陪諸公遊花田

天遣奇花擇地生，為憐體素更輕盈。
一天秋色風光好，十頃寒香露氣清。
不特爐熏資賸馥，最宜寶髻綴繁英。
憑誰移向瓊林去，乞與江梅作弟兄。

此花亦是可憐生，刻玉融酥萬數盈。
素質更兼秋色靜，幽香暗逐曉風清。
不須籬菊浮纖蘂，好學官梅綴落英。
來歲龍山高會在，又呼張丈喚殷兄。

白樂天內宴詩呈張侍御二十三丈

殷判官二十八兄猶有誇張少年處笑呼張丈喚殷兄

作意登臨快此生，愛花莫惜酒杯盈。
水沉風味香仍遠，

冰雪肌膚韻更清名字不須聯十友

曾端伯十友不品及素馨茉莉

題猶賴有三英

謂三

定知茉莉真瓜葛連璧誰家弟與

兄

瑞叶嘉禾亦旅生瓊田十頃足豐盈

土人賣花所得不減力耕

色侵

粉面人爭羨香入竒熏心自清寶蓋緝成雙縞帶筠籠

采盡萬瓊英

皆一時事

若逢靖節為佳妃

去聲

肯讓黃花作女

兄

坐間趙文舉韓叔夏菊詩云願為靖節妃故有女兄之稱

再成二詩錄呈諸公

漸老尋花學後生瓊玖折得我懷盈

左氏瓊玖
現盈懷

纖枝瘦葉

還相稱道骨僊風得許清懶共山樊對春色挽先籬菊
薦秋英由來玉樹堦庭秀不減風流謝氏兄

為嫌桃李太麤生晚殿羣芳不自盈冷艷坐消三伏暑

此花四五
月已開

高標獨占九秋清簪花擬欲酬佳節落帽從

教笑衆英最有詩翁被花惱從今喚作友于兄

老杜詩
山鳥

花吾友于注與之
同處若兄弟也

再用韻呈薛士昭提舉

天公作戲為誰生不數芳蘭九畹盈

韓詩樹蘭
盈九畹

美景良

辰無限好奇花妙句有餘清一枝瀟灑閨中秀百卉紛

華糞上英聞道河東有三鳳詩名還是屬難兄

士隆丈
學名世

某獲從之遊今
又竊窺佳作

撥置吏牘再作一詩以酬相惱之什

朝來衙集事還生不覺文書几上盈
碩我塵埃敗佳思
羨君心迹得雙清也知靜色撩詩興
無奈蕪辭愧俊英
得句已推三昧手
論文當拜十年兄

偶得兄字再成一詩

年來習氣尚書生喜得珠璣篋笥盈不羨奇葩爭嫵媚
且看麗藻鬪新清禪心欲向花前定佳句難酬座上英
知是詩人故相惱只愁無處問家兄

再用前韻

秋著寒花取次生千叢向曉露珠盈根靈不止芝房秀
香遠仍分桂子清弄雪飄飄疑玉女

唐昌玉蕊花事見劉禹錫詩

迎

風綽約認瑤英

元載寵姬薛瑤英唱香故肌香見蘓氏演義

品題自是推詞

伯誰道詩中只庶兄

湯惠休謂吳邁云吾詩可為汝詩父謝光祿云只可為庶兄見詩品

梅花料得是前生楚些招冤魄已盈却笑橫枝太消瘦

不堪淡月助淒清風流有客傳花譜火速無人集韻英

唐陳友元有韻英十卷

江左詩僧渾壓倒每慚得句犯師兄

惠崇詩多

犯古或譏之曰不道師兄多犯古古人詩句犯師兄見溫公詩話

用前韻簡趙薛二丈

誰遣閒愁百種生消除惟有酒尊盈自知老去風流盡

暫得官閒氣味清香閣寂寥謾隣女

杜秘書竊鄰女酥香後作永遇樂訣

別今所傳香閣寂寥是也見麗情集

羅幃調護想宗英

山谷戲馬中王詩羅幃綉幕深調護

二君此舉宜先罰大白先浮伯雅兄

劉表子弟好飲為三爵如兄弟曰伯

雅仲雅季雅出廣人物志

滿目淒涼秋思生寒香萬本綠疇盈風回蘭蕙由來遠

露浥薔薇分外清取次梳妝呈素面等閒流落惜芳英

鳳樓大手須公等好把蠻箋寄老兄

韓浦以蠻箋遺弟洎詩老兄得此全

無用助爾添修五鳳樓

瓜時正值一陽生已見眉間喜氣盈詔下鰲頭恩數寵

香含雞舌省曹清西湖好去窮清賞南國無從戀薜英
自此達尊兼德爵不唯年事合推兄

欽定四庫全書

定齋集卷十九

宋 蔡戡 撰

七言律詩

遊歸來園追想主人高風恨不及見因賦二詩
相門戚畹昔無鄰今代衣冠不乏人怪底山林成獨往
從渠鐘鼎漫橫陳居官政自風流在教子空餘翰墨新
蕙帳寂寥人不見幾多花鳥怨青春

幾年奔走困塵埃愧仰高風得得來喬木參天應手種

好花夾路為誰開
芳辰不惜終朝醉
晚色何堪惡雨催
極目青林無限意
歸鞍欲去更徘徊

歲暮有感

久困京塵厭劇煩
一麾江海養衰殘
簿書叢裏身空老
鼓角聲中歲又闌
贏得星星雙鬢白
空餘耿耿寸心丹
自憐憔悴今如許
盍向明時早掛冠

同顧廣文遊西湖

老來多病盍歸休
祇為江山得少留
萬頃澄波環勝境

千峯倒影漾中流十年兩作西湖長一日同為北牖遊
預約他時官事了與君重醉百花洲

東坡知潁州謝表
兩作西湖之長

登岸山觀用前韻

病足蹒跚好罷休又登絕頂故遲留霜明楓葉紅如染
露挹嵐光翠欲流遠目無窮休更望賞心未足卜重遊
超然勝絕非人世疑是身居麟鳳洲

水榭

誰移花本瓦盆中怪底幽香度曉風白石清泉助瀟灑

疎枝瘦葉綴玲瓏
晴窓坐對情無那
午枕清眠夢亦通
小品紛敷生意足
信知人力奪天工

不寐

獨卧虛齋百念衰
枕邊猶有數枝梅
青燈看盡愁腸斷
畫角吹殘旅夢回
髮為憂時渾欲雪
心存報國未全灰
功名蹭蹬身先老
那更駸駸急景催

有感

宦塗慾海久沉冥
自念虛為一世人
不向精微窮性理

多于蹇淺敝精神休論今古無窮事且乞江湖自在身
富貴功名付兒輩一邱一壑任吾真

仕路驅馳老不堪自憐蹤跡徧東南人間失意常八九
海內同心無二三蝴蝶夢中心自適蝸牛角上戰方酣
要知世事皆虛幻且向禪林更飽參

老來觸目總堪悲點檢尊前事已非方歎嬌嬈隨月落
何堪樊素與春歸梨花著雨還空委柳絮因風只欲飛
唯有庭前栢子樹歲寒相對兩依依

蚤歲登瀛浪自期一為俗吏困驅馳平生不得文章力
老去寧求世俗知到底麤官是男子從渠了事笑癡兒
全家飽煖還知否欲報君恩力已疲

我本胡山一老僧業緣未斷尚貪榮重來且了前生債
死去寧須後世名已絕塵嗔心不競那堪衰老病相縈
散花天女今何用為問維摩作麼生

百年光景急如梭攬鏡登樓奈若何歲月不堪供把玩
親朋已覺漸消磨功名自是身心懶憂懼端由患難多

富貴儻來非我有恍如一枕夢南柯

自詠

自憐衰病力難勝豈不懷歸畏友朋
隨牒偶來真漫士
打包即去類孤僧
頭顱種種何勞問
面目稜稜自取憎
賴有一廬今可老不妨飲水曲吾肱

浮生一夢疾南柯
白髮人間所閱多
土木形骸齊物我
萍蓬蹤跡慣風波
可憐造化小兒耳
其奈癡頑老子何
毀譽是非何足較
百年顏跖共山阿

奉祠東歸

老來不復歎飄零游宦真如水上萍
緜力何堪分閫寄寬恩猶許奉祠庭
休誇仙去騎驄李剩喜歸來化鶴丁
料得親朋相慰藉還驚雙鬢失青青

書生賤分動多奇浪得聲名毀亦隨
絕口不須談世事捫心唯有仗天知
人間變態渾如戲眼底風光總是詩
白石青泉無限好掛冠神武未為遲

書懷

扁舟東下自夷猶，胸次渾無一物留。
世味橫陳如嚼蠟，人生變滅似浮沤。
休休且畢山林願，去去空懷畎畝憂。
自念秋毫皆帝力，銜環結草若為酬。

江行阻風

鴈峯飄泊又經年，却憶槎頭縮項鱖。
三伏炎光真爍石，重湖駭浪遠連天。
快風坐閱千帆過，上水徒勞百丈牽。
坎止流行隨所遇，便當歸去訪林泉。

舟過池陽許倉蔡守留飲不果赴以詩謝之

小泊池陽暮靄中故人留我一尊同歸心已逐東流水
快意仍逢下水風自念相逢非草草也知別去太匆匆
歸來獨酌寒江上空想賓筵蠟炬紅

夜宿交石峽凌晨舟行適遇便風俄頃至小孤
山

好風特特送征帆百里俄驚指顧間薄暮暫留交石峽
遲明已到小孤山峯巒過目非吾有鷗鷺無心似我閒
幸得年豐歸去好長腰玉粒未應慳

金陵道中

蚤年遊歷徧諸方觸處無心是道場
三已不須形喜愠
兩來寧肯異炎涼
落霞孤鶩仍秋水
衰草殘雲又夕陽
天假一帆風力便回頭
五日到家鄉

東歸喜而有作

投老何堪再落南
病軀寧敢望生還
空慙馬援標銅柱
自分班超老玉關
萬里梅花愁思外
五湖煙水夢魂間
詔恩幸喜歸田里
旋築新堂榜愛閒

荆溪即事

我愛荆溪擬卜居萬家人物在蓬壺湖光潋灩新磨鏡
山色葱籠罨畫圖顧渚茶甘風袂爽石亭梅老月輪孤
功名已矣君休問一舸從教寄五湖

新居偶成二詩示鄰人李子真

薄宦歸來卜數椽慳囊倍費買山錢地幽不減林泉盛
天濶渾疑風月偏事與心違方問舍客將老至合歸田
平生豪氣今如此百尺樓高空自憐

我得祇園十畝間清溝一帶巧紫環芟夷叢竹通幽徑
指點荒城當遠山歌枕清宵聞鶴唳凭欄終日伴鷗閒
西鄰賴有詩人在二老風流任往還

愛閒堂

歸來築室傍城陰旋揭新名雅意深因病愛閒多得趣
逢場作戲亦何心鳥魚飛泳全真性水石風流有至音
衰朽自知無所用量才祇合在山林

劉公實以淮白為餉喜而作詩

食指朝來應吉占淮魚遠寄喜開奩肥鮮正自資糟粕
甘美何勞佐酪鹽未信鹿頭堪並進定知熊掌不能兼
慈闈一笑嘗珍味留與兒童例屬饜

以淮白南京山藥為子真太夫人壽即用前韻
鵲噪虛簷喜可占奇薰得得出珍奩山藷尚帶中原土
淮白仍餘東海鹽北物遠來難再致南烹久飫喜相兼
分甘擬作親庭壽料想齊眉亦共饜

和李子真八月十四日夜賞月之什

西園清夜喜追隨
唯恐冰輪出海遲
不但曠懷皆我輩
要知痛飲是吾師
十分未放蟾盈魄
三匝先驚鵲遠枝
此夕清歡那復有
世間能得幾人知

詠橘

江上霜明十月寒
枝頭顆顆綴金丸
王孫拋却黃金彈
酒伴收歸白玉槃
乍見渾疑盧橘熟
初嘗猶帶越梅酸
洞庭風味真相似
試與尊前比並肩

以蓮實餉李子真作詩為謝因用其韻

窮巷深居擺俗緣幽芳偏愛小池蓮戲將淨色供齋鉢
走送新房薦酒船懷橘孰無慈母念覓梨應有小兒憐
行看綠水芙蓉麗漫漫登臨憶仲宣

金壇燈市甚盛介卿見招不能往以詩謝之

可堪回首少年強燈夕追遊得許忙老去情懷甘寂寞
年來節物轉淒涼出門有礙身如絆異縣相望道且長
漫想故人行樂處水晶宮裏醉霞觴

燈夕不出偶成

晚歲光陰只自驚
眼中樂事歎何曾
雕鞍繡幃多游子
紙帳蒲龕一病僧
塵翳掃除方寸地
光明散作百千燈
維摩丈室跏趺坐
千息調勻喚不譍

奉酬介卿惜春之什

屈指駸駸向六旬
每於春事尚關情
病逢時節還虛度
老去光陰只暗驚
剩喜清新詩句好
休辭潏潏酒盃盈
榮枯代謝年年事
怪底鶯聲訴不平

介卿送方竹杖以詩謝之

何必窮搜到大宛仰山龍種出天然直方自得坤爻動
堅瘦宜居靈壽先剝喜登山扶病足不妨倚壁伴清眠
故人若問今無恙不似山僧故削圓

遊金山

襤被歸來萬事輕此行得得為登臨蒼崖斗絕山浮玉
碧瓦鱗差地布金千里江淮窮遠目十年塵土愧初心
何人為擊中流楫北望神州淚滿襟

題東臯

歸來相望築東臯千載風流獨慕陶
兩地林泉俱勝絕
二難人物撻孤高地連衡嶽浮空翠
天與湘江隔世塵
祇恐山靈回俗駕可容暇日再遊遨

燕坐小閣

丈室翛然一物無平生習氣痛消除
藥爐經卷常為伴
酒盞茶餅自作疎老去頭顱休更問
本來面目竟何如
泛觀博覽渾無用且讀西方貝葉書

雪中用王使君韻招介卿

江南雪片一冬深欺壓梅花瘦不禁入地遺蝗應掃迹
連阡宿麥始抽心幻成玉界清無滓踏碎瑤堦迹可尋
剝喜扁舟來訪我何妨乘興共清斟

雪中用前韻示汝咨汝功二姪

策試中庭雪已深玉樓凍合冷難禁哦成風絮頻呵手
撥盡寒灰苦用心梁苑巧粧花滿樹藍田幻出玉千尋
吾家二謝多才思莫惜高吟更淺斟

次蔡介卿雪中見寄

元冥作意逞雄豪
陵壓東君慘不驕
一氣回春何太晚
羣陰見曉未全消
漫誇呈瑞宜新麥
那似為霖掬旱苗
造物深機雖莫測
願言六氣自均調

等閒栽遍小園花
賸擬春來賞物華
不覺瓊英先滿樹
更看縞帶暗隨車
光搖玉鏡冰初泮
凍屈金鈎草未芽
料得小橋人不到
江梅欺壓任橫斜

病中書

短褐頽然一病僧
支離瘦骨伴枯藤
掃除習氣嗟猶在

擺脫塵緣愧未能案上縱橫堆藥裏篋中顛倒貯書滕
青鞋布襪從茲始試叩如來大小乘

挽胡通判

胡公家學本中庸挺挺雲來有祖風但得年皆餘八十
何妨位不至三公方期東帛迎申老忽舉空衣葬葛洪
江左祇今推甲族慶源衮衮自無窮

齊子餘侍郎挽詩

玉筍班中第一人堂堂風采照公卿箕裘四世儒科貴

簪橐三朝法從榮廣廈細旃多啓沃黃扉青瑣罄忠誠
經綸未了猶遺恨信史空留後世名

哀榮終始冠當時何況人生七十稀峴首正思羊叔子
宣城還憶謝元暉松階方俟甘泉對萬里俄驚朝露晞
他日西州忍重過為公回首一霑衣

李粹伯侍御挽詩

妙齡才氣已無雙軍陣飛揚翰墨場白簡空餘遺藁在
錦囊應有近詩藏生前且盡杯中物死去猶堪地下郎

逸氣不應埋宿草會看千丈吐光芒

猶記當年玉筍班凜然風采動朝端壯懷漫擬麒麟閣
直氣曾纓豸冠太白風姿圖像見衛公英爽夢魂寒
四州巷哭多遺愛留取甘棠勿翦殘

胡長文給事挽詩

中庸天下有胡公儒者端宜給事中華國高文推大手
回天讜論罄孤忠晨班玉筍人何在夜賜金蓮事已空
惆悵故園招隱地唯餘猿鶴怨西風

大才深結九重知，親灑宸章出禁闈。
壺遂暮年非不遇，謝公雅志或相違。
虎龍倍覺鍾山重，龜鶴還從蜀道歸。
故吏門生半天下，空垂老淚一霑衣。

錢大受挽詩

少年豪氣已如虹，抵掌論兵一世雄。
智略獨超倫輩上，功名只在笑談中。
美兵坐掃潢池盜，賣劍潛回渤海風。
恢復未酬人奄忽，佳城那忍葬滕公。

淝水功名取次休，空令遺恨滿滄洲。
禁中新賜黃金帶，

天上俄成白玉樓
京峴兒童應墮淚
江淮草木亦生愁
一朝雙劍齊飛去
會見光芒射斗牛

欽定四庫全書

定齋集卷二十

宋 蔡戡 撰

七言絕句

和胡東彛敷文巖桂四首

翠葆金英天與奇
清香十里已先知
春光不似秋光好
桃李紛紛何所施

移根月窟最珍奇
料得姮娥誰不知
挽住西風拚一醉
玉杯從此不徒施

獨占秋光自一奇
深藏巖壑少人知
招還茉莉同為伴
欺壓黃花不得施

秋入東山景物奇
花開亦遣野人知
二難佳句真連壁
顧我深慙嫫與施

王侍中智興武略英奇
敕授徐州節制雄才磊
落幕府既開所辟皆儒者
一旦從事于使院會
宴從容賦詩曰前某以韜略
發迹未曾留心章
句遂乃引紙援毫頃刻而就
余因作此以記其

事云

平生弓劍自相隨
剛被郎官遣作詩
江南花柳從君詠
塞北烟塵我自知

端約遺墨梅以詩謝之

先生出語已驚人
戲作梅花又逼真
眼底江山詩有助
胸中丘壑畫稱神

清香素質惱詩情
更倩揮毫為寫真
共挽東風拚一醉
不須摹倣費精神

龔彥則送水梔小盆口占為謝

動人春色不須多一點幽香叵奈何
蒼蘂林中誰折得故令相惱病維摩

王東卿惠墨戲副之以詩因次韻謝之

戲拈秃筆聊復爾一翦吳淞半江水
歸心已逐水東流夢到家山四千里

枯槎怪石出天然筆力挽回三百年
但見毫端倖造化不知胸次蘊天淵

揮翰等閒遊戲爾誰能十日畫一水煙雲杳靄咫尺間
遠勢應須論萬里

玉篆羅帶故依然吏部文章二百年畫筆詩篇兩奇絕
正須妙手寫龍淵

軒冕儻來真漫爾穩泛瀟湘弄煙水憑君收入畫圖中
一抹雲山數千里

東卿已
有行色

近時畫手說超然小景仍推趙大年誰識當家老摩詰
有如珠玉韞深淵

和胡端約巖桂六首

萬妃蕊珮影珊珊沉水薰肌粟玉顏曾記廣寒宮裏見
誰移仙種下人間

薔薇清露染衣裳綽約仙姿淡淡粧碧玉參差張翠幄
黃金錯落綴珠璫

羞澁東籬九日黃拒霜麤俗不宜霜此花底事小如許
無那惱人風味長

幽香拂拂影珊珊宜在江梅伯仲間懶對春風爭嫵媚

從他桃李自漫山

勿愁金盞墮秋風自是靈犀一點通
醉魄薰成寶篝細
香脂勻就玉肌豐

一枝小摘間簪冠酌酒酬花莫作難
唯有詩情被花惱
冥搜應作孟郊寒

題墨梅

誰作橫枝太逼真枝頭的皪眼俱明也
知筆力窺天巧
無奈清香畫不成

道中見梅

籃輿兀兀夢初回
怪底幽香觸鼻來
日暮天寒正愁絕
誰家籬落數枝開

二孤山

小孤相去大孤山
一望烟波百里間
風日晴和江似鏡
兩峰對峙擁青鬟

剡溪

六月衝炎出問囚
歸途因泛剡溪舟
短篷塊坐如深甌

却羨清寒王子猷

春郊即事

一犁春雨欲平塍
預卜今年穡事成
天意却愁人意懶
故令布穀苦催耕

提壺

斗酒千金未易沽
聲聲何事勸提壺
山禽豈解知人意
不道思家飯也無

鷓鴣

年來隨牒走駸駸險阻誰知客子心
盡日只憂行不得
愛人猶賴有斯禽

竹鷄

積雨霖淫四月寒春泥一尺未曾乾
勃姑猶自相呼喚
不念征人行路難

天柱峯

壁立千峯紫翠浮一峯直上更孤道
世間有此擎天柱
何用人懷杞國憂

日者鄭生謂余晚遇至人享上壽其詞多誕以
詩簡之

鐘鼎山林不兩全未聞富貴出神仙萬釘寶帶何須此
九轉金丹未可憐

黃陵廟

千載追崇古帝祠不知世代幾推移未須回首叫虞舜
今日親逢虞舜時

蒼梧杳靄暮雲陰尚記南巡歲月深不但邦人嚴祀事

至今千古想韶音

九宮壇齋居

齋居獨卧小禪房
暫得心閒氣味長
一炷爐熏春睡足
此身疑是在家鄉

六十

六十不歸何日歸
人生七十古來稀
憂愁疾病常相半
十載光陰轉瞬非

登三高亭

我為尊鱸得得來三高亭上且徘徊老來心事無機械
寄語羣鷗勿浪猜

平山堂

平山堂上略從容笑拍欄千萬事空因念醉翁行樂地
不知還又幾春風

于公叅政舊居

勇退方名大丈夫中興人物更誰如傳家不獨青氈在
況有南陽舊隱廬

次張伯信韻題吳園畫軸

誰把吳園較輞川
畫圖猶復想當年
要知故國非喬木
文采風流尚宛然

紅菊

為愛東籬九日黃
孤標正色占秋光
如何却被臙脂污
也學人間時世妝

送葛謙問

風流人物曹劉上
俊逸詩章鮑謝間
好似騎鯨天上去

不應著脚向塵寰

禪心久已絕貪嗔
劇飲狂歌總是真
世態紛紛翻覆手
不圖復見葛天民

有酒盈尊客滿門
陳卿百謫不須聞
癡兒官事何時了
我本無心出岫雲

杯酒從容相勸酬
須臾墮幘自搔頭
玉山傾倒從人笑
我醉欲眠君罷休

功名固有更何疑
平步青雲不用梯
他日玉堂風雨夜

略移清夢到荆溪

江上霜楓葉葉紅不堪搖落又西風只愁疊鼓催船去
千里相思月滿空

從來鐘鼎不關心此去溪山更可人儻有新詩摹勝槩
好憑尺素寄雙鱗

垂虹亭上少遲留卧看冰輪萬里秋正是蓴絲鱸膾美
不妨乘興五湖舟

莫唱陽關墮淚聲一杯相屬已酸辛丈夫感慨猶如此

應有偷彈玉筍人

顧我窮途醉未醒年來不復歎飄零
道山朋舊如相問為說生涯一草亭

乍寒

秀色芳心曉露叢翩翩涼葉舞西風
虛簷四面搖暈扇更遣清陰滿座中

詩餘

點絳脣

百索

織手工夫綵絲五色交相映同心端正上有雙鴛並

皓腕輕纏結就相思病憑誰信玉肌寬盡却繫心兒緊

水調歌頭

南徐秋閨宴諸將代老人作

肅霜靡衰草涼雨洗寒空
刀弓斗力增勁萬馬驟西風
細看外圍合陣忽變橫斜曲直妙在指麾中
號令肅諸將談笑聽元戎
坐中客休笑我已衰翁
十年重到今日此會與誰同
差把龍鍾鶴髮來對虎頭燕額
年少總英雄
飛鏃落金盃酣醉吸長虹

前調

送趙帥
鎮成都

擁節出閩嶠易鎮上岷山東西嶮阻分陝初不在榮觀
痛念兩河未復獨作中流砥柱屹若障狂瀾極目神京
遠百萬虎貔間趁良時攄豹略勇聲謹風飛雷厲威
令敵國膽生寒漢寢周原如舊一掃邊城烽火談笑定
三關識取投機會莫作等閒看

